

КАНОН СВЯТОМУ ИОАННУ ПРЕДТЕЧЕ

Глас 2-й

Песнь 1

Ирмос: Во глубине постла иногда фараонитское всевоинство преоруженная сила, воплощенное же Слово всезлобный грех потребило есть: препрославленный Господь, славно бо прославися.

Припев: Святой великий Иоанне, Предтече Господень, моли Бога о нас.

Крестителю и Предтече Христов, погружаемый всегда сладостями телесными ум мой уприви и волны страстей укроти, яко да в тишине Божественной быв, песнословлю тя.

Припев: Святой великий Иоанне, Предтече Господень, моли Бога о нас.

Недоуменным просветился просвещением, яко многосветлая звезда, мысленному Востоку предтекл еси, имже озарится сердцу моему, Крестителю, моли, омраченному всеми бесовскими приложениями.

Слава Отцу и Сыну и Святому Духу.

В реце бездну иногда, Всеумудре, погрузил еси, потоп содевающую благодатию всего преступления. Но молюся, потоки, блаженне, моих прегрешений иссуши, Божественным ходатайством твоим.

И ныне и присно и во веки веков. Аминь.

Чистыя Девы, Бога воплотившия, сродник был еси, блаженне Предтече, с Нею же ты чтим и молим, иже в Божественном храме твоём ныне живуще, храмы и нас сотвори Духа Святаго.

Песнь 3

Ирмос: На камени мя веры утвердив, расширил еси уста моя на враги моя, возвесели бо ся дух мой, внегда пети: несть свят, якоже Бог наш, и несть праведен паче Тебе, Господи.

Припев: Святой великий Иоанне, Предтече Господень, моли Бога о нас.

Исцели струпы души моя, и ум мой, омраченный небрежением, озари Божественным твоим ходатайством, Господень Предтече, и всякаго избави мя сопротивнаго обстояния, молюся.

Припев: Святой великий Иоанне, Предтече Господень, моли Бога о нас.

Неплодствие разрешил еси рождшия, родився Божиим промышлением, премудре пророче: неплодное убо сердце мое плодоносно ныне соделай, Господень Предтече, ходатайством твоим, добродетелей приносить прозябения.

Слава Отцу и Сыну и Святому Духу.

Любовию твоею созидающего Божественный дом, вышняго жития улучити моли: и иже верою храму твоему служащия, храмы Духа Божественнаго сотвори, Крестителю и Предтече, ходатайствы твоими.

И ныне и присно и во веки веков. Аминь.

Веселяшеся Предтеча в ложеснах носим матерних, и покланяшеся Господу, носиму в ложеснах Твоих, Благодатная, Егоже моли от всякия скорби избавити мя.

Седален, глас 2-й

Благоутробия ради милости, Блаже, спасти Твое создание, Христе, пришел еси, преклонь Небеса схождением Твоим. Темже страшное смотрение Твое поюще вопием Ти: мольбами Предтечи Твоего, очищение грехов подаждь нам, яко Един благоутробен.

Слава Отцѹ и Сынѹ и Святому Дѹхѹ, и ныне и присно и во веки веков. Аминь.

Богородичен

Предстательнице теплая христианом, Сынѹ Твоему молися присно, Богородице, всякаго злодейства и огорчения избавити нас борца, и дати нам прощение, в нихже согрешихом, за милосердие щедрот, Твоими молитвами, Мати Дево.

Песнь 4

Ирмос: Пришел еси от Девы, не ходатай, ни ангел, но Сам Господи, воплощся, и спасл еси всего мя человека. Тем зовѹ Ти: слава силе Твоей, Господи.

Припев: Святыи великий Иоанне, Предтече Господень, моли Бога о нас.

Преклоншему Небеса, и человеком беседовавшу, главѹ преклонил еси десницею твоею, пребогате: еуже мя соблюди, во смирении сохраняя сердце мое.

Припев: Святыи великий Иоанне, Предтече Господень, моли Бога о нас.

Пустыня тебе гражданина непроходная имяше, блаженне Предтече, темже вопию ти: пѹстѹ всякаго Божественнаго деяния бывшѹ дѹшѹ мою, плодоноснѹ сотвори.

Припев: Святыи великий Иоанне, Предтече Господень, моли Бога о нас.

Закон Божественный управляя, беззаконно заклан был еси. Темже молюся тебе: беззаконнѹюща мя всегда и прельщаема бесовскими прельщеньми, исправи.

Слава Отцѹ и Сынѹ и Святому Дѹхѹ.

Создав себе храм Владыце Царю, к Божественным селением ныне пришел еси, Предтече: яже полѹчити моли, тебе пресвятыи дом Воздвигшаго.

И ныне и присно и во веки веков. Аминь.

Призри на мя недѹгѹющаго, Всенепорочная, и разреши страсти моя лютыя и неѹдобоисцельныя, яко да величаю Тя, возвеличившѹю все человечество.

Песнь 5

Ирмос: Просвещение во тме лежащих, спасение отчаянных, Христе Спасе мой, к Тебе ѹтреннюю, Царю мира, просвети мя сиянием Твоим: иного бо разве Тебе Бога не знаю.

Припев: Святыи великий Иоанне, Предтече Господень, моли Бога о нас.

В течениих Иорданских струю нетления, Предтече, крестив Христа, моли истекания страстей моих изсѹшити, и потоки сладостныя наследовати, и праведных красная радования.

Припев: Святыи великий Иоанне, Предтече Господень, моли Бога о нас.

ѹже рыдаю, и содрогаюся страхом, и недоѹмением всегда содержим есмь, помышляя моя соделанная, и бѹдѹщий Сѹд ѹжасный: благоѹтробне Господи, пощади мя Твоего Крестителя мольбами.

Припев: Святыи великий Иоанне, Предтече Господень, моли Бога о нас.

Законополагаяя людем спасение, Предтече, в раскаянии прегрешений бывшее, посреде закона и благодати стал еси. Сего ради молим тя, образми покаяния нас просвети.

Слава Отцѹ и Сынѹ и Святому Дѹхѹ.

Даждь ми время покаяния, ѹнынно прешедшее все иждившему, Благодетелю, имея на сие молящаго Тя, Слове, Иоанна великаго Предтечѹ, и покаяния всемирнаго проповедника.

И ныне и присно и во веки веков. Аминь.

Наветы и ловления лъстиваго үмертвихся, Владычице Всенепорочная, оживи мя, яже рождающая Живот всех, Богородице, ипостасный, да Тя пою благочестно Всенепорочную.

Песнь 6

Ирмос: В бездне греховней валяясь, неизследную милосердия Твоего призываю бездну: от тли, Боже, мя возведи.

Припев: Святыи великий Иоанне, Предтече Господень, моли Бога о нас.

Глас Слова проповедавый, всех гласы восприем, проси, грехов прощение даровати верою поющим тя.

Припев: Святыи великий Иоанне, Предтече Господень, моли Бога о нас.

Сокрушение души моя исцели, и грехов бремя разреши, и паче надежды спаси мя молитвами твоими, блаженне Предтече.

Слава Отцу и Сыну и Святому Духу.

Иисуса, Егоже рукою твоею крестил еси, Предтече, моли, руки греха избавити мя, взимающая к Немү руке присно, всеславне.

И ныне и присно и во веки веков. Аминь.

Дреманием леностным одержим есмь, сон греховный тяготит сердце мое: Твоим, Пречистая, бденным ходатайством, воздвигни и спаси мя.

Кондак, глас 3-й

Прежде неплоды, днесь Христова Предтечу раждает, и той есть исполнение всякаго пророчества: Егоже бо пророцы проповедаша, на Сего во Иордане руку положив, явился Божия Слова пророк, проповедник, вкупе и Предтеча.

Икос

Восхвалим ныне Господня Предтечу, егоже священнику Елисавет роди из ложесн неплодных, но не без семене: Христос бо Един вместилище пройде непроходимо без семене, Иоанна неплоды роди, без мужа же сего не роди: Иисуса же, осенением Отца и Духа Божия, Дева роди Чистая. Но безсеменному явился от неплодове пророк, проповедник, вкупе и Предтеча.

Песнь 7

Ирмос: Богопротивное веление беззаконнующаго мучителя высок пламень вознесло есть: Христос же простре богочестивым отроком росу духовную, сый благословен и препрославлен.

Припев: Святыи великий Иоанне, Предтече Господень, моли Бога о нас.

Из корене секирою твоего покаяния исторг язвы страстнаго сердца моего, всади, Предтече, Божественное безстрастие и страх чистейший Божий, всякия злобы отчуждающий мя.

Припев: Святыи великий Иоанне, Предтече Господень, моли Бога о нас.

Во струях Иорданских яко крестил еси покрывающаго водами превыспренняя Господа, Того моли воду даровати Божественнаго үмиления присно очима моима, славный Предтече.

Слава Отцу и Сыну и Святому Духу.

Иже миру вземлющаго грех, Агнца Божия, Предтече, проповедав, Того моли, от козлищ части явити мя чужда, и десным Его овцам и мене сочетати, славне.

И ныне и присно и во веки веков. Аминь.

Неплодная утроба носяше Тя, Дево, во чреве носившую Слово воплощено: Егоже Божественными възграниц великий Предтеча, неплодная всесвятый плод, позна радуюся, и поклонися.

Песнь 8

Ирмос: Пещь иногда огненная в Вавилоне действия разделяше, Божиим велением халдеи опаляющая, верная же орошающая, поющая: благословите, вся дела Господня, Господа.

Припев: Святой великий Иоанне, Предтече Господень, моли Бога о нас.

Даждь десницу мне, на земли лежащему, Предтече, иже десницу простер, омыл еси водами Несквернаго: и избави мя скверны телесныя, всего мя очищая покаянием, и спаси мя.

Припев: Святой великий Иоанне, Предтече Господень, моли Бога о нас.

Имущи, душе, время покаяться, лености тяжчайший сон оттряси, и спешно победи, вопиющи Владыце твоему: Милосерде, ущедри мя, Крестителя Твоего мольбами.

Припев: Святой великий Иоанне, Предтече Господень, моли Бога о нас.

Потоцы страстей и воды злобы до души моя внидоша: блаженне Предтече, потщися скоро изъяти мя, иже речными струями измыл еси безстрастия тишайшую пучину.

Слава Отцу и Сыну и Святому Духу.

Увы мне, многа зла сотворшему: увы мне, единому прогневавшему Бога Преплагаго! Крестителю Христов, помози ми, и подаждь прегрешений моих разрешение, и долгов моих отсечение, ходатайствы Твоими.

И ныне и присно и во веки веков. Аминь.

Вышняго Бога плотию рождающая, от гноя мя возстави страстей оскорбляющих мя: и люте всего обнищавша, Божественными обогати, Пречистая, добродетельми, яко да воспою Тя спасаем.

Песнь 9

Ирмос: Безначальна Родителя Сын, Бог и Господь, воплощяся от Девы нам явися, омраченная просветити, собрати расточенная. Тем Всепетую Богородицу величаем.

Припев: Святой великий Иоанне, Предтече Господень, моли Бога о нас.

Кала мя избави греховнаго, Господи, Безгрешне Едине и Многомилостиве, Крестителя мольбами, иже Тебе проповеда всему миру, Агнца Божия, вземлющаго человеков грехи.

Припев: Святой великий Иоанне, Предтече Господень, моли Бога о нас.

Яко шипок благовонен, яко благоуханный кипарис, яко неувядаемый крин, яко мирочестно имейя тя, Господень Предтече, моих дел злосрадия избавляюся молитвами твоими, притекая к покрову твоему.

Припев: Святой великий Иоанне, Предтече Господень, моли Бога о нас.

Неплодствовать мя неплодными делы, всеблаженне, сотвори, добродетелей благоплодие присно приносяща, чадо мя Господне творя, и причастника Божественному Царствию, и святых собору купножителя.

Слава Отцу и Сыну и Святому Духу.

Нам любящим тя, и любовью почитающим, и в Божественном храме твоём ликующим, даждь с Небесе разрешение лютых, Предтече Господень, и жития исправление, и прегрешений избавление.

И ныне и присно и во веки веков. Аминь.

Носимү во үтробе Богоматерни, вся носящемү манием, поклонился еси, пророче: с Неюже моли смиренной спастися дүши моей, во многая впадающей по вся дни согрешения.